

# مينا منسي : نظام السيبي سرق 560 مليون في 4 أيام فقط بعد خفض قيمة الجنيه



الثلاثاء 15 مارس 2016 03:03 م

نشر الناشط والمدون "مينا منسي"، تدوينة تسائل فيها عن الأسباب التي دفعت محافظ البنك المركزي لضخ عطاء دولاري "استثنائي" بلغ 500 مليون دولار حين كان قيمة الجنية في البنك "7.83" قبل 4 أيام فقط من خفض قيمة الجنيه أمام الدولار بمقدار 112 قرشاً

حيث أشار "منسي" إلى أن الشركات والمؤسسات ورجال الأعمال الذين اشتروا الدولار بقيمته القديمة قبل الخفض، قدر ربحوا 560 مليون جنيهاً في 4 أيام فقط .

نص التدوينة :

- بتاريخ الاثنين ٢٢ فبراير ٢٠١٦ من ٣ أسابيع محافظ البنك المركزي طارق عامر قال في فيديو مصور : «السيبي يتركنا نبدع» ولا نفكر في تخفيض قيمة الجنيه» ركز قال من ٣ أسابيع لا نفكر في تخفيض قيمة الجنية

- بتاريخ ٨ مارس قرر البنك المركزي برئاسة طارق عامر انه يلغي الحد الأقصى للايداعات في البنوك يعني بدل ما كنت تقدر تودع مبلغ محدد يوميا تقدر تودع بدون حد اقصى يعني تشتري دولارات او تدبرها من البنك براحتك و تحط في حسابك البنكي يا معلم

- بتاريخ الخميس ١٠ مارس ٢٠١٦ بعد يومين من رفع الحد الأقصى للايداعات بالنقد الأجنبي : أعلن البنك المركزي المصري يوم الأحد ضخ 500 مليون دولار في عطاء استثنائي بديلاً عن العطاء الدولارى الدورى، الذى كان مقرراً اليوم بنحو 40 مليون دولار للبنوك العاملة فى السوق المحلية بسعر 7.8301 جنية للدولار

☆ يعني البنك المركزي باع ٥٠٠ مليون دولار "نص مليار دولار" للبنوك بسعر 7.83 جنية ... باع امتي؟! بتاريخ ١٠ مارس و البنوك باعت جزء من الفلوس دي لمستثمرين و أفراد و (مؤسسات) و الباقي احتفظت بيه منهم بنوك حكومية و بنوك أجنبية يعني اللي اشترى من اسبوع سواء البنوك او اللي اشترى من البنوك اشترى بسعر 7.83 جنية

- بتاريخ إمبارح اللي هو ١٤ مارس يعني بعد ٤ أيام فقط من بيع طارق عامر لنص مليار دولار بسعر 7.83 رفع طارق عامر سعر الدولار ليصبح 8.85 قرش يعني بزيادة سعر 1.12 قرش يعني اللي اشترى النص مليار دولار من ٤ ايام فقط كسبوا رسمي فهمي نظمي 1.12 على كل دولار يعني كسبوا في ٤ ايام فقط ٥٦٠ مليون جنية بسبب قرار طارق عامر في خبطة واحدة .. مالك اتصدمت ليه من الرقم؟! ايوة 560 مليون جنية مكسب (رسمي) في 4 ايام

السؤال الاول : لما النية مبيته لرفع سعر الدولار ليصل قيمته 8.85 جنية بشكل رسمي ليه طارق عامر باع 500 مليون دولار من ايام بس بسعر 7.83؟ فهو مصحش امبارح الصبح قال اية الزهق دة انا هخفض قيمة الجنية قصاد الدولار ... لا طبعاً القرار ميعادة متحدد من فترة

السؤال الثاني: مين هيتحاسب على اهدار فرق السعر بين 7.83 اللي اتباع به الدولار من ٤ ايام و سعر امبارح 8.85 ؟ كدة في ٤ ايام طارق عامر مخسر الدولة 560 مليون جنية لانه بايع الدولار بالرخص بسعر مدعوم من ٤ ايام بس نص مليار دولار مخسر خزينة الدولة على كل دولار 1.12 جنية شوف انت 560 مليون جنية فرق سعر دول فيهم كام تصيبحة على مصر من اللي قال عليهم السيبي

السؤال الثالث : هل تم توجيه الدولارات دي من البنوك لصالح حسابات عملاء معينين سواء افراد او مؤسسات او شركات بعد قرار رفع الحد الاقصى للايداعات اليومية؟؟!!

السؤال الرابع: لو انت عايز تخفض قيمة العملة بفرض حس النية (اللي مش موجود) ازاي فجأة تخفضه 14% ليه محصلش دة بشكل تدريجي كل يوم قرش صاغ او اتنين؟؟!!

☆ مهو المفاجئة ان قرار بيع ال 500 مليار دولار حصل بعد ما البنك المركزي رفع الحد الاقصى للايداعات اليومية داخل الحسابات بيومين يعني من الاخر القرار متفصل عشان النص مليار دولار المدعومة تتباع و تدخل حسابات بدون حد اقصى و بعد 4 ايام اللي اشترى كسب 1.12 لكل دولار (رسمي)

نفتح الحد الاقصى للايداعات - نبيع نص مليار دولار بالرخيص - اشترى و حطوهم في الحسابات و بعد ٤ ايام هكسبكم ٥٦٠ مليون جنية ( اكثر من نص مليار مكسب في ٤ ايام) عملية على مائة بيضة الدولة خسرتهم من خزيتها لصالح ناس معينين ... لا ياض مفتحين

المهم ان طارق عامر عشان يغلوش على النص مليار دولار اللي باعهم من كام يوم و اتعمل بيهم السيوية بالسعر القديم راح طرح بالسعر الجديد 200 مليون امبارح و 200 مليون النهاردة قال يعني بيغرق السوق دولارات عشان يقضي على السوق السوداء اللي هي في الأساس مستحيل تخسر البلد في ٤ أيام ٥٦٠ مليون جنية بس الباشا عملها و خسر خزينة الدولة فرق السعر

أنا مش معترض على السرقة لان دة العادي تحت حكم عصابة ... انا معترض على سذاجة السرقة يا اخي لو مش عارفين تلعبوها بصياغة عشان متتهرش بالشكل المفضوح دة ابعث قولتي اظبطها لك .. ما ينفعش تبقى مهروشة كدة

ارجع معايا لادول سطر كتيبه في البوست اللي بتاريخ الاثنين ٢٢ فبراير ٢٠١٦ اللي قال فيه طارق عامر محافظ البنك المركزي بيقول : «السياسي يتركنا نبدع»

في اوربا و الدول المتقدمة دة لو حصل بيسموه سرقة لو ثبت استفادة افراد او شركات او مؤسسات معينين من القرارات و اللي اخذ القرارات دي بيتحاكم و في اقل توصيف جنائي اسمه جريمة اهدار المال العام ... هنا في مصر بيسموه ابداع و كمان برعاية الرئيس

المصدر : [اضغط هنا](#)